

## CONVENIO DE COLABORACIÓN ENTRE A AXENCIA TURISMO DE GALICIA E A ASOCIACIÓN GALEGA DE ACTIVIDADES NÁUTICAS - AGANPLUS PARA DAR SERVIZO AO CAMIÑO PORTUGUES POLA COSTA A TRAVÉS DOTACIÓN DE EQUIPAMENTOS DE MOBILIDADE NÁUTICA E TERRESTRE EN CAMPOSANCOS.

Santiago de Compostela

### REUNIDOS

Dunha parte, D. Alfonso Rueda Valenzuela, vicepresidente primeiro e conselleiro de Presidencia, Xustiza e Turismo, en representación da **Axencia de Turismo de Galicia**, en calidade de presidente, segundo se establece na Disposición adicional novena do Decreto 130/2020, do 17 de setembro (DOG núm. 190, do 18 de setembro), e de conformidade coa atribución do artigo 15.2.c) dos estatutos da Axencia Turismo de Galicia, aprobados polo Decreto 196/2012, do 27 de setembro (DOG núm. 193, do 9 de outubro).

E pola outra, D. Manuel Soliño Bermúdez, en calidade de Presidente da **Asociación Galega de Actividades Náuticas – en adiante AGANPLUS**, con CIF G36.356.160, con domicilio en Rúa Rosalía de Castro 56, Baixo, (Edificio Palmira), 15895, O Milladoiro, Ames (A Coruña), debidamente autorizado para subscribir o presente convenio pola Xunta Directiva.

As partes recoñécense mutuamente a capacidade suficiente para o asinamento deste convenio, e interveñen en función dos seus respectivos cargos e no exercicio da facultades que, para convir en nome das entidades que representan, teñan conferidas e,



## EXPOÑEN

**Primeiro.-** Que a Asociación Galega de Actividades Náuticas - AGAN+ é unha entidade sen ánimo de lucro constituída en decembro de 1999 como primeira agrupación das empresas de actividades náuticas de Galicia e co ámbito de actuación de toda a Comunidade Autónoma de Galicia.

Os seus fins son os da promoción da cultura náutica, promover a desestacionalización da oferta e o crecemento e emprego no ecosistema turístico-náutico, o desenvolvemento do valor da conservación dos espazos naturais, a promoción do acceso ás actividades náuticas para todos os cidadáns, a promoción e acreditación das certificacións de calidade no sector náutico, poñer en funcionamento, promocionar e apoiar a comercialización de produtos de turismo náutico ofrecidos por empresas/profesionais ou territorios baixo uns estándares, converter ós municipios en destinos náuticos de calidade mediante unha estratexia de tematización, e a formación en temas relacionados co mar, a pesca e o medio ambiente mariño.

Así mesmo, a Asociación Galega de Actividades Náuticas, é o principal colaborador coa Xunta de Galicia, no desenvolvemento da marca de calidade europea náutica NEA (Nautismo no Espazo Atlántico) aplicada aos Cruceiros Costeiros, actuando como coordinador deste proxecto dende 2016 con Portos de Galicia e a Axencia Turismo de Galicia.

Por outro lado AGAN+ é a única asociación náutica de Galicia que ten participado en proxectos europeos dende o 2003 coas principais rexións náuticas europeas atlánticas, sendo a única entidade privada náutica de referencia en Galicia, que pode desenvolver e certificar a carta de calidade náutica NEA (Náutica no Espazo Atlántico).



Ademais, a AGAN+ é a única entidade de Galicia no ámbito da náutica galega que participa e foi seleccionada como xefe de fila e beneficiario nun proxecto do programa Interreg Galicia-Norte de Portugal, o denominado 217\_ECDESTIN\_3IN, que a Axencia Turismo de Galicia considerou de interese mediante a sinatura da carta de apoio e o seu cofinanciamento a través dun convenio firmado en 2018 e con vixencia ata 2020.

Que AGAN+ ademais é a única entidade náutica privada de Galicia que foi seleccionada para representar ao sector náutico de Galicia no proxecto CAPITEN pertencente a iniciativa comunitaria Interreg Espazo Atlántico, que é o principal proxecto náutico aprobado para as rexións do Atlántico europeo, sendo ademais a entidade seleccionada para coordinar a área de Cabotaxes Atlánticos (Paquete de traballo 7) para todos as 18 entidades, principalmente administracións rexionais, dos 5 países participantes.

Nos citados proxectos AGAN+ levou a cabo varias actividades para o desenvolvemento da náutica no Destino Náutico Río Miño tanto na provincia de Pontevedra coma en Ourense, tendo amplo coñecemento das circunstancias de navegación do entorno do río Miño e contacto cos territorios transfronteirizos a través da CIM Alto Minho e as súas cámaras municipais.

**Segundo.-** A Axencia Turismo de Galicia, en virtude do disposto no artigo 9 dos seus Estatutos, aprobados polo Decreto 196/2012, do 27 de setembro, é a entidade da Xunta de Galicia á que lle corresponde o exercicio, entre outras, das competencias en materia de fomento e competitividade do turismo, e no exercicio das súas funcións, a esta entidade correspóndelle executar as medidas definidas para a promoción e fomento do sector turístico de Galicia, levar a cabo plans e programas de acción e colaborar no desenvolvemento de actuacións que lle permitan acadar os seus obxectivos. Un deles é o desenvolvemento do



Camiño Portugués pola Costa que require dispor dun servizo seguro, fiable e dispoñible todo o ano para o paso dos peregrinos entre Caminha e A Guarda, posibilidade que actualmente non está garantida e promover a xeración de cruceiros costeiros e fluviais no entorno da desembocadura do Miño.

Dentro da colaboración que ven mantendo con AGAN+ para o desenvolvemento dos cruceiros costeiros e fluviais de Galicia, considera que co apoio mutuo para a dotación dos equipamentos básicos necesarios para facer posible a mobilidade, principalmente para servizo ós peregrinos do Camiño Portugués pola costa ao seu paso polo tramo náutico entre Caminha e Camposancos (A Guarda) e secundariamente entre o pantalán de Camposancos na Guarda e o resto do Baixo Miño, servirán de polo de desenvolvemento do río Miño como destino fluvial navegable aproveitando para o seu posicionamento internacional a imaxe do Camiño Portugués pola Costa.

Tamén se considera que con esta dotación de equipamentos a Axencia promove actuacións relacionadas coa diversificación económica e a creación e mantemento do emprego a través do apoio a actuacións de turismo rural, a produción de bens e servizos estratéxicos para a economía da zona rural, o apoio ao comercio nas zonas rurais e a información e formación profesional ocupacional e continua dos traballadores.

**Terceiro.-** Que todas estas entidades consideran de interese a colaboración nas actuacións obxecto deste convenio porque contribúen de forma clara ao desenvolvemento do Camiño Portugués pola Costa e o Río Miño, a promoción internacional de Galicia como destino náutico e natural fluvial e o desenvolvemento e posta en valor do patrimonio e dos produtos locais agroalimentarios das comarcas de interior galegas.



**Cuarto.-** Que, polas razóns expostas, concorren aos efectos do establecido nos artigos 19.4.c) e 26.2 a) da Lei 9/2007, do 13 de xuño, de subvencións de Galicia, e 36.c) e 40.1a) do Regulamento da dita lei, aprobado polo Decreto 11/2009, do 8 de xaneiro, razóns de interese público para o outorgamento da subvención, posto que o obxecto do convenio contribúe á valorización do patrimonio cultural e natural, tanto material como inmaterial, o desenvolvemento do turismo costeiro e o rural, e a promoción internacional de Galicia como destino náutico e natural de costa e de interior e o desenvolvemento e posta en valor do patrimonio e dos produtos locais agroalimentarios das comarcas de interior galegas.

Este proxecto trata de dotar dos equipamentos básicos ao Camiño Portugués pola Costa no seu tramo náutico entre Caminha e A Guarda (Camposancos) para desenvolver este percorrido e xerar a creación de emprego e o desenvolvemento económico dos concellos galegos polos que discorre. Asemade busca converter o río Miño nun atractivo turístico internacional convertendo a Galicia nun destino náutico fluvial patrimonial, apoiando a mobilidade terrestre e náutica dende Camposancos cara o resto do Baixo Miño e integrando en itinerarios fluviais con escalas de carácter estable e previsible a oferta complementaria de natureza e de enogastronomía de alto interese no río Miño. Todo isto mediante o apoio á adquisición dunha embarcación ecofriendly de motorización eléctrica con capacidade para pasaxe e para bicicletas que poida ofrecer horarios estables para o tramo náutico do Camiño Portugués pola costa, entre Caminha e A Guarda, e para ofrecer itinerarios náuticos nesa parte do río Miño, xunto coa adquisición dunha estación de mobilidade terrestre dotada de bicicletas eléctricas e vehículo eléctrico que permitan favorecer a interconexión entre Camposancos e A Guarda, e os enclaves turísticos de interese máis próximos como Santa Trega, e que poidan atraer a potenciais turistas converténdose



nunha actuación tractora e cunha grande capacidade de arrastre para outras actividades turísticas do territorio, dado que complementa outros produtos con servizos turísticos como o aloxamento, a restauración, benestar, cultura, natureza, etc..., permitindo reactivar esta zona fluvial, e apoiando o mantemento e a creación de emprego.

Deste xeito concorren así, razóns de interese público que xustifican o outorgamento dunha subvención sen que proceda promover a concorrencia pública ao ser a entidade beneficiaria á única entidade que pode desenvolver a actuación subvencionada.

Por todo isto, dada a converxencia de ámbitos de actuación, o mutuo interese en xuntar esforzos na consecución duns fins comúns, e para unha maior eficacia na execución das actuacións, as partes asinantes, en virtude da representación coa que interveñen, acordan a subscrición do presente convenio, de acordo coas seguintes

## CLÁUSULAS

### **Primeira. Obxecto do convenio**

O obxecto do presente convenio é regular as bases de colaboración entre a Axencia Turismo de Galicia e a Asociación Galega de Actividades Náuticas – AGAN+ para dar servizo ao Camiño Portugués pola Costa a través dotación de equipamentos de mobilidade náutica e terrestre en Camposancos dende 2022.

En concreto realizaranse as seguintes actividades:

- Dotación de equipamentos de mobilidade náutica: embarcación para transporte de pasaxe e bicicletas con motorización eléctrica.



- Dotación de estación de mobilidade terrestre con equipamento de bicicletas, triciclos e patíns eléctricos.

## Segunda.- Orzamento e financiamento

O orzamento estimado para as actuacións obxecto deste convenio ascende a 150.000,00 € (IVE incluído), co seguinte desagregamento:

<b>A – DOTACIÓN DE EQUIPAMENTO DE MOBILIDADE NÁUTICA</b>	
<p>Adquisición dunha embarcación de motorización eléctrica para dar servizo ó tramo náutico Caminha-Camposancos do Camiño Portugués pola Costa e para desenvolver unha oferta de cruceiros fluviais polo río Miño coas seguintes características:</p> <ul style="list-style-type: none"> <li>• Eslora menor a 10 m</li> <li>• Manga entre 3 a 3,5 m</li> <li>• Calado 0,5 m</li> <li>• Material de construción: aluminio</li> <li>• Prazas: 12 pasaxeiros + patrón</li> <li>• Espazo para transportar polo menos 4 bicicletas</li> </ul>	121.000,00 €
<b>B – DOTACIÓN DE ESTACIÓN DE MOBILIDADE TERRESTRE</b>	
<p>Adquisición dunha estación de mobilidade terrestre para garda e disposición desasistida de equipos de mobilidade.</p> <ul style="list-style-type: none"> <li>• Espazo de 13,00 metros de longo por 2,44 m de ancho, composto por 2 módulos de 6 m e un anexo de 1 m para pañol</li> </ul>	19.000,00 €
<b>C – DOTACIÓN DE EQUIPAMENTO DE MOBILIDADE TERRESTRE</b>	



Adquisición de equipos de mobilidade terrestre: bicicletas, triciclos e patíns eléctricos	6.000,00 €
<b>D.- GASTOS FINANCEIROS, DE ASESORÍA XURÍDICA OU FINANCEIRA, NOTARIAIS E REXISTRAIS OU GASTOS DERIVADOS DA CONSTITUCIÓN DA GARANTÍA BANCARIA</b>	4.000,00 €
<b>TOTAL</b>	<b>150.000,00 € (IVE INCLUÍDO)</b>

A Axencia Turismo de Galicia financiará o custo que supoña para o AGAN+ a adquisición destes equipamentos ata un importe máximo de 150.000,00€, con cargo á aplicación orzamentaria 05.A2.761A.781.2, proxecto 2018 00002, dos orzamentos xerais da Comunidade Autónoma de Galicia para o 2022.

Esta achega canalizarase a través dunha subvención concedida polo procedemento de concesión directa de acordo co establecido nos artigos 19.4.c) e 26 da Lei 9/2007, do 13 de xuño, de subvencións de Galicia, e 36.c) e 40 do seu regulamento, aprobado polo Decreto 11/2009, do 8 de xaneiro.

### **Terceira. Compromiso das partes**

I.- A Asociación Galega de Actividades Náuticas – Agan+ comprométese a:

-Desenvolver as actuacións recollidas na cláusula primeira deste convenio, e que constitúen o seu obxecto.

- Incluir en toda a documentación e soportes específicos das accións obxecto do presente convenio que se trata dunha actuación con financiamento da **Xunta de**



**Galicia e incluír a marca do Xacobeo 2021-22**, de acordo co manual de identidade visual, aprobado polo Decreto 104/2021, do 24 de xuño, polo que se aproba a actualización do Manual de identidade gráfica Xacobeo 2021-22 (DOG núm. 132, do 13 de xullo)

-Achegar a información que lle sexa requirida pola Intervención Xeral da Comunidade Autónoma, o Consello de Contas e o Tribunal de Contas no exercicio das súas funcións de fiscalización e control do destino do investimento.

-Comunicar á Axencia Turismo de Galicia a obtención doutras subvencións, axudas ingresos ou recursos que financien a actividade subvencionada procedentes de calquera administración ou entes públicos ou privados nacionais ou internacionais. Esta comunicación deberá efectuarse tan pronto como se coñeza e en todo caso, con anterioridade á xustificación da aplicación dos fondos recibidos.

-Presentar, antes da sinatura deste convenio, certificacións de atoparse ao corrente no cumprimento das obrigas tributarias ou fronte á Seguridade Social e de non ter pendente de pago algunha outra débeda coa Administración pública da Comunidade Autónoma, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei 9/2007, do 13 de xuño, de subvencións de Galicia, de conformidade co disposto nos artigos 10 e 13 do Decreto 11/2009, do 8 de xaneiro, polo que se aproba o Regulamento da Lei de subvencións de Galicia.

-Subministrar á Axencia Turismo de Galicia, en virtude do disposto no artigo 4 da Lei 1/2016, do 18 de xaneiro, de transparencia e bo goberno, previo



requirimento, toda a información necesaria para o cumprimento pola Axencia Turismo de Galicia, das obrigas previstas no Título I da citada lei.

-Todas as demais obrigas establecidas no artigo 11 da Lei de subvencións de Galicia.

II.- A Axencia Turismo de Galicia comprométese a colaborar no financiamento do custo das actuacións previstas a través da achega establecido na cláusula segunda.

#### **Cuarta.- Inexistencia de relación laboral**

A subscrición do presente convenio non implicará relación laboral ou de calquera outra natureza entre a Axencia Turismo de Galicia e as persoas ou profesionais dependentes das entidades que desenvolvan as accións que constitúen o seu obxecto, de tal xeito que, por este concepto, non se lle poderá esixir responsabilidade algunha directa nin subsidiaria.

#### **Quinta.- Compatibilidade**

De conformidade co disposto no artigo 40.1 d) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a achega económica prevista neste convenio será compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou organismos internacionais.

En ningún caso o importe das subvencións as que se refire o parágrafo anterior poderá superar, no seu conxunto, o custo da actividade subvencionada, ao



abeiro do disposto no artigo 17.3 da Lei 9/2007, do 13 de xuño, de subvencións de Galicia.

### **Sexta.- Xustificación dos fondos, pagamento e gastos subvencionables**

I. A xustificación dos fondos efectuarase segundo a modalidade de conta xustificativa, de acordo co previsto nos artigos 28 da Lei 9/2007, do 13 de xuño, de subvencións de Galicia e o artigo 48 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño que a desenvolve, que conterá a seguinte documentación:

1) Memoria de actuación, xustificativa do cumprimento das condicións impostas na concesión da subvención, con indicación das actividades realizadas e dos resultados obtidos.

2) Unha memoria económica xustificativa do custo das actividades realizadas, que conterá:

a) Unha relación clasificada dos gastos e inversións da actividade, con identificación do acredor e do documento, o seu importe, data de emisión e, no seu caso, data de pagamento.

b) Facturas ou documentos de valor probatorio equivalente no tráfico xurídico-mercantil ou con eficacia administrativa incorporados na relación á que se fai referencia no apartado anterior e a documentación acreditativa do pago. No caso de tratarse de gastos inferiores a 1.000 € poderá xustificarse o pagamento mediante recibo do provedor.



- c) Os documentos acreditativos dos gastos realizados con medios ou recursos propios e a indicación, no seu caso, dos criterios de reparto dos custos xerais e/ou indirectos incorporados na relación a que se fai referencia na letra a).
- d) Unha relación detallada doutros ingresos ou subvencións que financien a actividade subvencionada con indicación do importe e a súa procedencia.
- e) Os tres orzamentos que, en aplicación do artigo 29.3 da Lei de subvencións de Galicia, deba solicitar o beneficiario.
- f) No seu caso, a carta de pago de reintegro no suposto de remanentes non aplicados así como dos intereses derivados destes.

Así mesmo, deberá remitirse o detalle da documentación e soportes publicitarios nos que consten a colaboración da Xunta de Galicia e a marca do Xacobeo 2021-22.

- 3) Certificación bancaria de titularidade da conta na que se deba realizar o pagamento.

Por outro lado, a entidade beneficiaria deberá presentar os certificados de que se atopa ao corrente no cumprimento das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración pública da Comunidade Autónoma, así como unha declaración responsable de non estar incurso en ningunha das prohibicións para obter a condición de beneficiario, establecidas no artigo 10 da Lei 9/2007, do 13 de xuño, de subvencións de Galicia, de conformidade co disposto nos artigos 11 e 13 do Regulamento da dita lei, aprobado polo Decreto 11/2009, do 8 de xaneiro.



II. A contribución da Axencia Turismo de Galicia minorarase proporcionalmente no caso de que non se xustifique o orzamento total que figura na cláusula segunda, sempre e cando se acade o obxecto deste convenio de colaboración.

Non obstante, non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas no orzamento estimado na cláusula segunda, cando obedezan a razóns xustificadas e as actuacións que se levaran a cabo garden relación directa co obxecto do presente convenio.

III. A comunicación relativa á obtención doutras subvencións, axudas, ingresos ou recursos para a mesma finalidade, así como a modificación das circunstancias que fundamentasen a concesión da subvención, deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

Cando as actuacións obxecto do convenio fosen financiadas, ademais de coa subvención, con fondos propios ou doutras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas, de conformidade co establecido no artigo 28.6 da Lei 9/2007, do 13 de xuño, de subvencións de Galicia.

IV. Á vista desta documentación, o órgano competente da Axencia Turismo de Galicia, expedirá certificación acreditativa do cumprimento dos fins obxecto do convenio e tramitará o seu pagamento.

Para estes efectos, considerarase gasto realizado o que foi efectivamente pagado con anterioridade á finalización do referido prazo de xustificación. Exceptúanse aqueles gastos cuxos pagamentos deban efectuarse nun momento



posterior por axustarse aos calendarios de recadación, como os ingresos a conta do IRPF ou cotas por seguros sociais liquidables con posterioridade á data de xustificación. O importe destes ingresos ou cotas considerarase xustificado coa presentación do documento de gasto (factura ou documento equivalente) en que se reflecta o importe de retención ou cotizacións devindicadas na data de xustificación. A entidade beneficiaria quedará obrigada a presentar os documentos acreditativos da súa liquidación nos dez días seguintes ao remate dos prazos legalmente establecidos para o seu ingreso no período voluntario.

V. De conformidade co artigo 29.7 da Lei de subvencións de Galicia, serán **subvencionables** os gastos financeiros, os gastos de asesoría xurídica ou financeira, os gastos notariais e rexistrals e os gastos periciais para a realización do proxecto subvencionado e os de administración específicos son subvencionables se están directamente relacionados coa actividade subvencionada e son indispensables para a adecuada preparación ou execución desta. Así mesmo, os gastos derivados da constitución da garantía bancaria tamén serán subvencionables.

O importe correspondente ao IVE só poderá ser imputado ao convenio na contía que non sexa recuperada ou compensada pola entidade beneficiaria, o cal deberá ser acreditado por esta coa xustificación do convenio. A Axencia Turismo de Galicia resérvase o dereito a solicitar toda a documentación que considere precisa en relación coa xustificación do convenio.

Ao abeiro deste convenio poderán financiarse os gastos nos que tivese incorrido a entidade beneficiaria, como consecuencia da realización de actuacións acordes co obxecto do convenio e que se teñan efectuado desde o **1 de xaneiro de 2022**.



O prazo para presentar a documentación xustificativa será o **15 de decembro de 2022**.

### **Sétima.- Pagamentos anticipados e a conta**

Poderanse realizar pagamentos anticipados, ao abeiro do disposto no artigo 63.1.Dous do Regulamento da Lei de subvencións de Galicia, que suporán entregas de fondos con carácter previo á xustificación, como financiamento necesario para levar a cabo as actuacións obxecto deste convenio, de ata o 50% da subvención concedida e sen que se supere a anualidade prevista en cada exercicio orzamentario. A concesión do anticipo realizarase mediante resolución motivada.

Así mesmo poderanse realizar pagamentos a conta que poderán supoñer a realización de pagamentos fraccionados que responderán ao ritmo de execución das accións realizadas. Para proceder ao seu pagamento, AGAN+ deberá enviar a documentación xustificativa relacionada na cláusula sexta.

A suma dos pagamentos anticipados e a conta non será superior ao 80% da porcentaxe correspondente aos pagamentos xustificados, nin excederá da anualidade prevista en cada exercicio orzamentario, conforme establece o artigo 62 do citado Regulamento.

Os pagos anticipados e a conta deberán estar garantidos de conformidade co establecido no artigo 67 do Decreto 11/2009, de 8 de xaneiro, polo que aproba o Regulamento da Lei de subvencións de Galicia. A garantía deberá cubrir o 110% do importe das contías pagadas a conta ou das cantidades anticipadas.

Non obstante, segundo o disposto no artigo 65.4 do Regulamento da Lei 9/2007, do 13 de xuño, de subvencións de Galicia, aprobado polo Decreto



11/2009, do 8 de xaneiro, AGAN+ queda exonerada da constitución de garantía nos pagamentos anticipados e a conta, cando a súa contía acumulada non supere os 18.000€.

### **Oitava.- Reintegro da subvención**

Procederá o reintegro parcial ou total da subvención nos casos previstos no artigo 33 da Lei 9/2007, do 13 de xuño, de subvencións de Galicia e concordantes do Decreto 11/2009, do 8 de xaneiro.

No caso de que se produza exceso das subvencións percibidas de distintas entidades públicas, AGAN+ deberá reintegrar o exceso xunto cos xuros de demora, nos termos que establece o artigo 23 do Decreto 11/2009, do 8 de xaneiro, polo que se aproba o Regulamento da lei de subvencións de Galicia.

### **Novena.- Comisión de seguimento**

Para o seguimento do convenio e da súa execución, así como para propoñer a interpretación e resolución das dúbidas que se poidan suscitar na súa aplicación, créase unha Comisión de Seguimento que estará integrada por dous representantes designados por cada unha das partes asinantes.

A súa actuación axustarase ao establecido na Lei 40/2015, do 1 de outubro, de réxime xurídico do sector público e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á



subvención concedida serán resoltas pola persoa titular da Dirección da Axencia Turismo de Galicia.

### **Décima.- Modificación do convenio**

Toda alteración das condicións tidas en conta para a concesión da subvención dará lugar á modificación do convenio, sendo de aplicación das previsións ao respecto contidas na Lei 9/2007, do 13 de xuño, e no regulamento da dita lei.

As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

### **Décimo primeira.- Causas de resolución**

-Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O transcurso do tempo estipulado sen que culminen as actividades acordadas.



- O acordo unánime de tódolos asinantes.
- A decisión xudicial declarativa da nulidade do convenio.

### **Décimo segunda.- Natureza xurídica e xurisdición competente**

Este convenio ten natureza administrativa, e queda fóra do ámbito da Lei 9/2017, do 8 de novembro, de contratos do sector público, que o exclúe expresamente no artigo 6.2.

Seralle de aplicación o réxime determinado pola Lei 9/2007, do 13 de xuño, de subvencións de Galicia; o Decreto 11/2009, do 8 de xaneiro que a desenvolve; os preceptos básicos da Lei 38/2003, do 17 de novembro, xeral de subvencións, e do Real decreto 887/2006 que a desenvolve; a Lei 1/2016, do 18 de xaneiro, de transparencia e bo goberno; a Lei 39/2015, do 1 de outubro, do procedemento administrativo común das administracións públicas; na Lei 40/2015, do 1 de outubro, de réxime xurídico do sector público, e polas demais normas de dereito administrativo aplicables e, no seu defecto, polas normas de dereito privado.

As controversias derivadas da aplicación ou interpretación do presente convenio serán resoltas en última instancia pola persoa titular da Dirección da Axencia Turismo de Galicia, cuxas resolucións poñen fin a vía administrativa. Será competente a xurisdición contencioso-administrativa para resolver na vía xurisdiccional as citadas controversias.

### **Décimo terceira.- Publicidade e rexistro do convenio**

En cumprimento do disposto no artigos 18 e 20.8 da Lei 38/2003, do 17 de novembro, xeral de subvencións (LXS en adiante) comunicárase a subscripción



deste convenio á Base de Datos Nacional de Subvencións, que opera como sistema nacional de publicidade de subvencións.

Segundo o artigo 17 da Lei 1/2016, de 18 de xaneiro, ademais da información que debe facerse pública segundo a normativa básica en materia de transparencia, a Axencia Turismo de Galicia publicará o texto íntegro do convenio.

Así mesmo estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre as obrigas específicas de información sobre convenios.

Asemade, procederase á inscrición do convenio no Rexistro Público de Subvencións conforme ao establecido no artigo 16 da Lei 9/2007, do 13 de xuño, e no Decreto 132/2006, do 27 de xullo.

#### **Décimo cuarta.- Autorización e consentimento para que se publiquen os datos persoais e demais especificacións que figuran no convenio**

Coa sinatura do presente convenio as partes asinantes prestan o seu consentimento para incluír e facer públicos a través do Portal de Transparencia e Goberno Aberto e do rexistro regulado no Decreto 132/2006, do 27 de xullo, os datos de carácter persoal e mailo resto das especificacións contidas no convenio.

#### **Décimo quinta.- Protección de datos persoais**

As partes asinantes responsabilizaranse de que calquera tratamento de datos persoais que puideran levarse a cabo en virtude do convenio se realice con absoluto respecto ás normas de seguridade e de conformidade co establecido no Regulamento 2016/179 (UE) Xeral de Protección de datos (en adiante, RXPD),



na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPDGDD) e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a súa adecuada formalización e desenvolvemento e en base ao disposto no artigo 6.1 b) do RXP.

### **Décimo sexta.- Vixencia**

Este convenio entrará en vigor na data da súa sinatura e terá vixencia ata o 31 de decembro de 2022.

E en proba de conformidade de canto antecede, asinan este documento no lugar arriba indicado.

Pola Axencia Turismo de Galicia

Pola Asociación Galega de  
Actividades Náuticas

Alfonso Rueda Valenzuela

Manuel Soliño Bermúdez

